

Nua pomai cun il rument?

Evitar, reciclar e dismetter il rument cun resguard a l'ambient

■ **Insicura daventa tut rument – i dependa be dal temp. Rument pudain nus dentant evitar u sminuir, reutilisar ed il rest dismetter en urden.** Il consum da mintga product engregescha l'ambient, ina giada dapli – in'otra damain. La produziun ed il transport da mintga object consumescha energia, chaschuna rument e tschufrogna la terra, l'aria e l'aua. Consumar e dismetter conscient gida da proteger las materias primas natiralas e noss ambient. Mintgin po returnar battarias duvradas ed apparats electronics la nua ch'els vegnan vendids, metter il vaider en il container da vaider e cumpostar il rument d'iert. La finamira fiss da stuaier arder mo 20 pertschient dal rument. Anc pli impurtant èsi però d'evitar ch'i dat in-summa rument – quai è e resta la proteziun da l'ambient la pli efficazia.

Il rument è in problem per l'ambient

Ils davos decennis è il rument daventà in problem per noss ambient. Ozendi datti blier dapli rument che pli baud. Il motiv è l'aut standard da viver che nus avain. Nus vulain adina dapli, tut adina pli nov, meglier e pli bel. Tranter il 1960 ed il 1980 è creschida la quantidad da rument d'aglomeraziun per trais giadas. Tranter il 1980 e l'onn 2000 è la quantidad da rument creschida supplementarmain per 70%. Er ils



tips da ruments en sa midads. Ruments novs en ils plastics, las chemicalias e las substanzas radioactivas. Bleras da quellas substanzas en ruments spezial, perquai ch'ellas cuntegnan substanzas fitg toxicas. Il rument spezial en fitg grevs da dismetter.

Pli baud bittava la gliued il rument en foss e valluns. Quai attirava massas utschels e ratuns e provocava in terribel tuffien, aua contaminada e schizunt incendis. Oz ston tut ils ruments combustibels vegnir dismiss en in implant per arder rument. En pli tutga la Svizra en il rom da las quotas da riciclad internaziunalas tar ils topreutilisaders – e quai areguard tut las materialias. Nus riciclain per exempel 95 pertschient dal vaider, ina cifra che po strusch pli vegnir meglierada. Ed uschia vegnan ricicladas ad onn impresunants 51 pertschient da las totalmain 5,46 milliuns tonnas rument chasan.

Grazia a quests progress paran l'ambient e la cuntrada relativamain nets – almain sin l'emprima egliada. Malgrà tut la tecnica da dismissa resta dentant ina tscherta contaminaziun. Las substanzas



Er en Svizra è littering – bittar davent rument en il spazi public – in problem creschent.

FOTO: MATCHKA/PIXELO

nuschaihlas arrivann en pitschnas dosas e senza ch'ins vesia quai en la terra, en l'aria ed en l'aua. Exempels per talas substanzas en l'argent viv, il cadmium ed auters metals grevs. Er las luadiras e las restanzas dal nettegiament dal gas da chamin ston vegnir deponidas sco rument spezial.

Producir damain rument

Quai dat da pensar: En Svizra dovra mintga persuna en media 225 kg palpieri ad onn. Bleras plantas ston ins pinar persunter e la produziun dovra blera aua ed energia ...

In liter ieli vegl po impestar 1 milliun liters aua ...

Per producir ina batteria dov'ins 50 giadas dapli energia che quai ch'ella furnescha ...

Facit: Il meglier rument è quel che vegn evità da la bell'entschatta.

Per reducir la quantidad da rument gia a la funtauna vali da resguardar tscherts criteris cun far las cumissiuns: Eleger products che pon vegnir utilisads ditg: products ch'han ina lunga durada da vita e che pon vegnir reparads, reutilisads u rechargiads. Preferir products cun uschè pauc emballadi sco pussaivel. S'acquistar la savida davart il ciclus dals products: fabricaziun, utilizaziun e moda da dismetter.

I vala la paina da pensar gia cun cumprà il satg da rument: cumprà products en emballadi da returnar e per reemplenir. Cun duvrar buttiglias reutilisablas, cun purtar vestgadira veglia anc duvrabla e cun cumprà products durabls pon ins reducir supplementarmain la quantidad da rument.

Reciclar e reutilisar

Reciclar rument per gudagnar puspè materias primas e las integrar en la produziun economica è in impurtanta procedura per cumbatter la stgarsezza d'energia e da resursas da noss mund.

La conscienza che la recuperaziun ha avantats era dal puntg da vista economic era gia baud avant maun en Svizra. Gia en il 19avel tschientaner gudagnavan firmas svizras daners cun ramassar materialias riciclablas. L'aspect e l'argument da la proteziun da l'ambient è pir vegnì tiers, cura che la societad ha persurchi ch'ins po sminuir durablamain il basegn creschent da materias primas dal mund modernisà unicamain cun riciclar.

Per rimnar ed arder il rument pajan ils consumers cun il satg da rument u cun la taxa da satg. Arder è pia char – riciclar percenter blier pli bunmartgà. Las vischnancas ans gidan a producir uschè pauc rument dad arder sco pussaivel. Ellas mettan a disposiziun lieus da rinnada per vaider, tola alva, ieli vegl, chartun, PET e.u.v. Uschia vegnan quels materials rinnads separadamain e reutilisads en ina procedura da riciclar. Per rimnar e dismetter auters materials, sco per exempel mobiglias e fier vegl, fixeschan intginas vischnancas dis spezial. En autras vischnancas pon las abitantas ed ils abitants purtar questa rauba bloccanta en in deposit central. Cun reutilisar il rument spargnain nus materias primas (p.ex. lain per palpieri nov) e blera energia (p.ex. forza electrica per fabricas da vaider).

Tar var in terz dals products vegn la reutilisaziun finanziada cun la taxa da dismissa anticipada (TDA). La TDA è – ensemen cun l'obligaziun da restituiziun – in instrument ideal per organisar la dismissa d'ina part dals bains. Quai vala p.ex. per products cun ina durada da vita limitada sco battarias, emballadis da bavrondas u tar apparats da l'electronica da divertiment.

Tge tutga nua?

Vaider: Buttiglias da vaider, vaiders da confitura e.a. Zavràr sche pussaivel tenor colurs. Nagins magiels e plats, nagin vaider da fanestras.

PET: Buttiglias da Pet (cun l'ensaina PET). Naginas buttiglias da plastic d'aschieu, ieli e larg. Dismetter en urden buttiglias da PET: splattar ed or cun l'aria, si cun il viertgel ed en il container per PET.

Tolas d'atschal: Stgatlas da tola, viertgels da vaiders da confitura (quels magnetics tutgan tar la tola alva). Naginas stgatlas da colur e nagins vapurisaders.

Battarias: Tut las battarias, era quellas pitschnas dad uras e.u.v.

Palpieri e chartun: Palpieri net e chartun lià ensemen bain, ils dis da rinnada. Betg metter il chartun tar il palpieri.

Aluminium: Stgatlas da bavronda, tubas senza viertgel. Ils emballadis d'aluminium en marcads cun l'ensaina ALU e n'èn betg magnetics.

Cumpost: Tut las vanzadiras da fritgs e legums. Passa 20 % dal rument è organic e cumpostabel. Quel na tutga betg en il satg da rument.

Satgs da rument: Buttiglia d'aschieu da plastic, stgatlas da colur vidas, satgets da tratgas precuschinadas, vapurisaders, satgets da té, pachet da latg tetra e.a.

Rument spezial: Buttiglias da latg en la rinnada speziala dals distributurs gronds; stgatlas da colur betg vidas a la drogaria; padellas tar la ferramenta veglia; patronas da stampaders vegnan per part reemplenidas; vaiders en reutilisabls.

Apparats electric ord servetsch: Apparats per la chasada, electronica da divertiment, utensils e giugarets electric, apparats da biro e d'informatica, apparats da fotografar, lampas spezialas e.u.v. pon ins returnar gratuitamain a mintga post da vendita.

Mobiglias duvrablas: Enstagl da bittar ellas cun l'urden bloccant, las pon ins surdar ad ina butia da segund maun u offrir cun inserat pitschen.

La gestiun dal rument

Ins po bain reducir la quantidad da rument e riciclar tant material reutilisabel sco pussaivel. Ins na po però betg evitar dal tut da producir rument. Ma ins po empruvar da dismetter il rument uschia ch'el donnegia uschè pauc sco pussaivel il terren, l'aria e l'aua. La gestiun dal rument consista da trais pass. L'emprim zavr'ins il rument e rimna quel. Lura mettan ins mintga sort da rument en in lieu, sco per exempel il rument d'iert sin il cumpost ed il lain en l'ardera da rument. En il terz pass dovran ins ils products ch'ins ha zavrà e transformà en il segund pass. Ins po per exempel fertilisar l'iert cun il cumpost e stgaurar chasas

cun la chalira ch'ins producescha cun arder rument.

Las vischnancas ston rimnar il rument e dismetter quel correctamain. Per far quai cuminaivlamain ed uschè bunmartgà e favuraivel a l'ambient sco pussaivel, èn las vischnancas sa reunidas a corporaziuns. Malgrà las pussaivladads da riciclar han ins stuì arder il 2006 en il Grischn anc adina 80 000 tonnas rument, cumbain betg tut en l'agen chantun: ina part vegn transportada cun la viafier a Niederurnen ed a Horgen e dismiss là en implants dad arder rument. En l'avegnir èsi dentant previs dad arder tut il rument dal Grischn a Trimmis.

En il Grischn vegni ars dapi l'onn 1914 rument en moda controllada. L'emprim a Tavau Laret, pli tard a Cazas e dapi l'onn 1975 en il stabiliment per arder rument (SAR) a Trimmis. Il material combustibel vegn manà natiers cun vaguns da viafier e camiuns. Per proteger l'aria e las auas èn vegnidas applitgadas a partir dals onns 1980 proceduras per nettegiar las svapurs. Plinavant vegn la vapur, che resulta cun arder il rument, manada en ina rait da chalur a distanza fin en la citad da Cuira. Cun gist uschè blera chalur persa producescha la SAR a Trimmis electricitad che vegn alura manada en la rait electrica.

Ma betg tut las parts dal rument ardan. Quai che n'arda betg, resta enavos en l'implant en furma da luadiras. Quellas cuntegnan era metals grevs. Auters ruments sviluppan cun arder gas toxics. Per betg engrevgiar l'ambient vegnan quellas substanzas nuschaihlas filtradas, ensemen cun las particlas da pulvra e la tschendra, cun agid d'in filter electric ed in lavader da gas da chamin. Dal chamin sortan alura mo pli vapurs d'aua e dioxid carbonic (CO₂). Las luadiras e las restanzas en ils filters èn toxicas. Ellas ston vegnir dismissas en deposits spezial, separads d'auters ruments. Er auters geners da rument basegan ina dismissa speziala. Ruments chasans privlus (products chemics, dissolvents, battarias, ieli da motors) ston vegnir tractads en moda separada e dismiss en lieus previs per quai.



Separar correctamain il rument n'è nagin striegn.



Il satg da rument Rimnatut mussa co dismetter buttiglias da PET.

BROSCHURA D'INFORMAZIUN DAL 1999

Brischar rument en il liber

Brischar rument en il liber è generalmain scumandà en Svizra. In'exceptziun fan unicamain ruments setgs, natirals da gaud, da champagna e d'iert, sch'i resulta mo pauc fim cun brischar. Il brischar ruments d'iert po

dentant er vegnir scumandà dal tuttafatg dals chantuns. Bleras vischnancas porschan ultra da quai in servetsch da manizzim u laschan vegnir a prender il rument d'iert dal servetsch da rument verd.

La preschentaziun:
Dossier «Dismissa da rument»
Dapli infurmaziuns:
chatta.ch/?hiid=676
www.chattà.ch



Construcziun da la rait da chalur a distanza tranter Trimmis e Cuira.

FOTO: GEVAG